



UPM Institusi Akademik Dunia, Teraju Disiplin Pertanian Tropika - Canselor



Tuanju Canselor, Sultan Sharafuddin Idris Shah bergambar bersama Tun Abdullah, penerima Ijazah Kehormat Doktor Pembangunan Pertanian (empat dari kanan) dan penerima-penerima Anugerah Universiti selepas sidang 1 sesi 1 Majlis Konvokesyen UPM ke-33 pagi tadi.

SERDANG, 8 Ogos – Canselor Universiti Putra Malaysia (UPM), Sultan Sharafuddin Idris Shah menyifatkan UPM sebagai salah sebuah institusi akademik dunia yang menerajui disiplin pertanian tropika.

Baginda berkata strategi 'pertanian tropika baharu' (New Tropical Agriculture) merupakan pendekatan terbaik dalam memperkukuh ilmu disiplin pertanian tropika yang akan menjadikan universiti lebih proaktif berhadapan dengan cabaran disiplin dalam bidang ilmu ini.

"UPM telah mendefinisikan pertanian tropika baharu sebagai pengeluaran dan pengurusan bio-sumber tropika yang membabitkan kaedah tekno-saintifik dan ekonomi tanpa menjajaskan biodiversiti, ekosistem, kesihatan dan kebajikan masyarakat.

"Beta yakin terhadap keupayaan UPM memberi sumbangan penting kepada pertumbuhan negara melalui penyelidikan bagi menghadapi cabaran pemanasan global dan kehausan sumber yang ketara, seperti tanah, air, minyak dan perikanan," titah baginda pada Majlis Konvokesyen UPM ke-33 di Pusat Kebudayaan dan Kesenian Sultan Salahuddin Abdul Aziz Shah (PKKSSAAS), UPM.

Baginda turut memuji langkah universiti mengadakan dua jalinan kerjasama akademik, iaitu dengan Sheffield University, United Kingdom dalam menawarkan ijazah doktor falsafah dan Cambridge University, United Kingdom bagi program Master Sains Pengurusan Tanah.

"Beta berharap kerjasama ini akan melonjakkan martabat pendidikan tinggi negara dan nilai graduan kita ke tahap yang lebih membanggakan dari semasa ke semasa bagi membolehkan negara menyediakan modal insan kelas pertama sebagai pesaing global," titah baginda.

Sementara itu, baginda menzahirkan kebanggaan atas kejayaan UPM menembusi pengiktirafan global, iaitu program Master Pentadbiran Perniagaan (MBA) Sekolah Pengajian Siswazah Pengurusan UPM (GSM) adalah yang terbaik di Malaysia dan telah disenaraikan pada kedudukan kesembilan di Asia oleh Asian MBA Online Directory yang dikeluarkan pada hujung tahun 2008 dan UPM telah berjaya memenangi anugerah Islamic Development Bank (IDB) Prizes For Science and Technology daripada Islamic Development Bank yang berpangkalan di Arab Saudi, berdasarkan impak tinggi UPM dalam bidang penyelidikan dan pembangunan (R&D), rekaan, inovasi, siswazah dan pengajian.

Sultan Sharafuddin turut melahirkan hasrat agar penyelidikan UPM dapat memberi impak kepada masyarakat global dan kaitannya dengan agenda pembangunan masyarakat yang bertamadun tinggi, negara yang makmur dan sejahtera dan ini bertepatan dengan hasrat universiti untuk menjadi peneraju kepada pertanian tropika baharu.

"Beta berharap inisiatif UPM menubuhkan Pusat Kecemerlangan Forensik Alam Sekitar UPM akan berupaya menjadi satu strategi dan pendekatan bestari untuk mengawalselia alam sekitar dari pencemaran bahan toksik dengan penggunaan Teknik Cap Jari (fingerprinting) forensik alam sekitar yang membolehkan saintis mengenal pasti pihak yang bertanggungjawab mencemarkan alam sekitar," titah baginda.

Pada majlis sama, Canselor berkenan menganugerahkan Ijazah Kehormat Pembangunan Pertanian kepada mantan Perdana Menteri Malaysia Kelima, Tun Abdullah Ahmad Badawi atas sumbangan beliau dalam pembangunan sektor pertanian sebagai enjin ketiga pertumbuhan ekonomi negara.

Pengurniaan Ijazah Kehormat kepada mantan Perdana Menteri tersebut sebagai penghargaan atas kesungguhan beliau memartabatkan sektor pertanian baharu dengan memberi pengiktirafan kerajaan kepada UPM sebagai Pusat Kecemerlangan Pendidikan Pertanian semasa di bawah kepimpinan beliau.

Baginda juga menasihati para graduan agar mengamalkan khazanah ilmu yang diperolehi di UPM demi melahirkan modal insan yang berwibawa dan berdaya saing memandangkan era globalisasi kompetitif masa kini menuntut graduan untuk berfikir di luar rangka pemikiran.

Sesi pertama pada pagi 8 Ogos telah menyaksikan seramai 462 graduan menerima Ijazah

Doktor Falsafah (Ph.D), Ijazah Sarjana, Ijazah Sarjana Muda dan Diploma.



Baginda Tuanku Canselor menyampaikan ijazah kepada graduan pada Majlis Konvokesyen UPM ke-33 yang telah berlangsung di Pusat Kebudayaan dan Kesenian Sultan Salahuddin Abdul Aziz Shah (PKKSSAAS).

Disediakan oleh Seksyen Media dan Publisiti, Bahagian Komunikasi Korporat UPM.

Hak Cipta Terpelihara 2007
Universiti Putra Malaysia